

EDICT DV ROY, SVR

LA DEFENSE DES
Querelles, Duels, appels, & rencontres:
portant confirmation & augmentation
des peines cōtenuës aux Edicts,
Declarations, & Arrests faicts cy de-
uant sur mesme subiect.

Publié en Parlement le 29. Aoust 1623.



A TROYES;

Par PIERRE CHEVILLOT,
l'Imprimeur ordinaire du Roy.

M. DC. XXIII.

Avec priuilege de sa Maiesté.





EDICT DU ROY, SVR
la deffense des querelles, Duels,
appels, & rencontres : portant
confirmation & augmentation
des peines cõtenuës aux Edicts,
Déclarations, & Arrests faicts
cy deuant sur mesme subiect.



LOVIS par la
 grace de Dieu
 Roy de Fran-
 ce & de Na-
 uarre, A tous
 presens & à
 venir, Salut. Nous auons vn
 extreme regret & déplaisir de
 voir iournellement nos Edicts

A ij

& Ordonnances faits sur les querelles, Duels, combats de rencontres & autres, si peu gardez & observez contre les intentions tres-sainctes du feu Roy nostre tres-honoré Seigneur & Pere (que Dieu absolve) & les nostres : ce que nous estimons estre plustost arriué par la licence des guerres & mouuemens passez qu'autrement. Et afin que ce des-ordre ne passe plus auant au tres-grād mespris des commandemens de Dieu, sçachant combien ceste effusion de sang est detestable deuant sa diuine Majesté, & qu'au preiudice de nos ordonnances il ne soit contreuenue à nostre volonté, nous

5
sommes resolu^s d'y remedier
en sorte, que nos subiets en re-
çoient le fruit que desirons,
& que nostre conscience en de-
meure déchargée. Pour ces cau-
ses & autres à ce nous mou-
uans, Apres auoir deliberé de
cet affaire en nostre Conseil,
où estoient les Royne, nostre
tres-honorée Dame & Mere,
aucuns Princes de nostre Sang,
autres Princes, plusieurs Offi-
ciers de nostre couronne, &
principaux de nostre Conseil,
Nous auons dict, statué & or-
donné, disons, statuons & or-
donnons, voulons & nous plaist
par ces presentes signees de no-
stre main, que tous les procez
commencez à la requeste de

nos Procureurs generaux ou leurs Substituts , contre tous ceux qui ont contrevenu aux Edicts des Duels & Declaratiós faictes sur les rencontres demeurent surciz , sans qu'il soit passé outre , leur en imposant silence iusques à ce qu'apres auoir mis en consideration la qualité du crime , & les portemens des coupables, nous en ayons autrement ordonné. Et afin que chacun cognoisse la ferme resolution en laquelle nous sommes , de faire perdre toute esperance à nos subjets de quelque qualité & condition qu'ils soient , d'estre par nous dispensés à l'aduenir de la rigueur , effect & execution

entiere & absoluë de nos Edicts
 & Declarations , Auons dere-
 chef dict , ordonné & declaré,
 disons,ordonnons & declarons
 par ces presentes, que les Edicts,
 ordonnances & Declarations
 cy deuant faiçts, tant par nostre
 dit feu Seigneur & Pere, que
 Dieu absolue, que par Nous,
 sur le faiçt des querelles, appels,
 Duels, & rencontres, soient de
 nouveau publiez, & particulie-
 rement l'Edict du mois de Iuin
 mil six cens neuf, faiçt par no-
 stredit feu Seigneur & Pere,
 que nous voulons estre gardé
 & obserué inuiolablement en
 tous les poinçts, selon sa forme
 & teneur. Et pour oster tous
 pretextes & difficultez sur le

faict desdits Duels & rencontres. Voulons ordonnons & nous plaist, que si aucun de quelque qualité & condition qu'il soit, est si temeraire d'appeller, recevoir billet, ou parole, conduire où se porter sur le lieu du combat, où qu'en suite d'une querelle precedente, ou de parole, ou par effect, il vienne apres à rencontrer son ennemy, & l'attaquer, que tant l'appellant que l'appellé ou l'agresseur au faict desdites rencontres soient tenus, comme nous les tenons & declavons criminels de leze Majesté, Divine & humaine, Ordonnons que comme tels il soit procedé contre eux selon la rigueur de
nos

nos Ordonnances, & defenſes
 precedentes: Declarant confor-
 mément à celles de l'année mil
 ſix cens dix-ſept, que pour le
 ſeul faiet deſdits appels, Duels
 & rencontres, & auſſi-toſt que
 le delict aura eſté commis, tou-
 tes charges & offices dont ſont
 pourueuz les delinquans, ſe-
 ront vaquantes & impetrables,
 & tous leurs autres biens, tant
 meubles qu'immeubles, acquis
 & conſiſquez, la moitié à Nous,
 laquelle ſans autre declaration
 que la preſente ſera vnïe & reü-
 nie à noſtre Domaine à perpe-
 tuité, ſans que iamais pour
 quelque cauſe & conſideration
 que ce ſoit, elle en puiſſe eſtre
 tirée ny deſ-vnïe, ſauf l'intereſt

B

des Seigneurs dominans pour la mouuance des arriere-fiefs, si le cas y échet, & l'autre moitié aux Hospitaux des lieux, où ils se trouueront situez, sans autre Iugement que de l'action faicte ainsi que dessus, les fraiz des procez prealablement prins. Defendons à nos Cours Souueraines & autres Iuges, d'auoir aucun esgard aux Declarations qui pourroient estre accordées contraires à la presente: Les declarant dès à present nulles & subreptissement obtenuës. Ordonnons en outre, que tous ceux qui porteront lesdits billets, & conduiront au combat, soit au faict des rencontres & duels, de quelque qualité qu'ils

puissent estre , Laquais ou autres, soient punis de mort , sans aucune grace ny remission : Et si aucunes en sont presentees à nos Cours Souueraines ou autres Iuges. Voulons qu'ils n'y ayent aucun esgard. Et pour d'autant plus recognoistre la verité des faiçts exposez pour obtenir grâces par aucuns, qui mettent en auant leurs combats estre arriuez inopinément, & pour differét prins sur l'heure. Nous ordonnons que nul ne sera receu à les poursuiure, qu'il ne soit actuellement prisonnier à nostre suite ou en autre prison Royale. Et d'autant qu'à faute de tesmoins, bien souuent les crimes demeurent impunis.

B ij

Voulans apporter tout ce qui se peut pour l'entiere obseruation des presentes, Nous auôs de plus ordonné & ordonnons, que sur la notorieté il soit à la requeste de nostre Procureur general & ses Substituts, decreté prise de corps contre les absens, en vertu duquel, à faute de les pouuoir apprehender, leurs biens seront saisis, & eux adiournez à trois briefs iours, consecutifs l'un l'autre, & sur iceux, defauts donnez à nostredit Procureur general & ses Substituts, pour en estre le profit adiugé sans autre forme ny figure de procez, dans huietaine apres le crime commis.

SI DONNONS en mandement

à nos amez & feaux Conseil-
lers, les gens tenans nos Cours
de Parlemens, Baillifs, Senef-
chaux, ou leurs Lieutenans, &
à tous autres nos Iusticiers, &
Officiers qu'il appartiendra,
que ces presentes ils facent lire,
publier & enregistrer, & le con-
tenu en icelles : Ensemble les
susdits Edicts & Declarations
du feu Roy nostre tres-honoré
Seigneur & Pere & de Nous,
executer, garder & observer in-
violablement selon leur forme
teneur, sans les enfreindre ny
souffrir qu'il y soit contrevenu,
par qui, ny en quelque sorte &
maniere que ce soit. Enjoi-
gnant à nostredit Procureur
general & ses Substituts faire

pour ladicte execution toutes
poursuittes & diligences pour
ce requises & necessaires. Car
telest nostre plaisir. Et afin que
ce soit chose ferme & stable à
tousiours ; Nous auons faict
mettre nostre seal à celsdictes
presentes, sauf en autres cho-
ses nostre droict & l'autrui en
toutes. Donné à saint Ger-
main en Laye au mois d'Aoust
l'an de grace mil six cens vingt-
trois, & de nostre regne le qua-
torzieme.

Signé, LOVIS.

Et sur le reply, Par le Roy,

DE LOMENIE.

Et seellé du grand seau de cire
verte en lacs de soye rouge &
verte.

Et à costé V I S A.

Et sur le reply est encore es-
crit,

*Registrees, ce requerant le Pro-
cureur General du Roy : Ordonne
la Cour qu'elles seront leuës & pu-
bliees à son de trompe & cry pu-
blic par les carrefours de ceste ville,
& autres lieux acoustumez, pour
estre executees selon leur forme &
teneur, ensemble l'Arrest du dix-
septiesme Iannier mil six cens qua-
torze, aux charges portees par les
Arrests de verification des pre-
cedens Edicts des vingt-sixiesme*

*Iuin mil six cens neuf, vnziesme
 Iuillet mil six cens vnze, & dix
 huitiesme Mars mil six cens trei-
 ze, & copies d'icelles enuoyees par
 les Bailliages & Seneschaussees de
 ce ressort, pour y estre pareillement
 deuës, publiees & registrees à la di-
 ligence des Substitués dudit Pro-
 cureur General, lesquels certifie-
 ront la Cour de leurs diligences au
 mois. A Paris en Parlement le
 vingt-neufiesme Aoust mil six
 cens vingt-trois.*

Signé, DV TILLET.

Et encores sur ledit reply est
 escrit,

Et



